

TÈYÂTE WALLON

**Po treùs
sâcisses**

Pièce d'in' ake dà Jean-Luc DERWA.

Toutes demandes à la SABAM
DERWA Jean-Luc Tél : 04/247.20.15.

Pèrsonèdjes :

Djulien Blawète: *Eric Lismont*
Pièr Roufling: *Gerard Poncelet*
Françwès Vèrdi: *Jean-Alain Loyson*
Djâke Citerne: *Jérémy Collin*
Léa Brasse: *Maxine Lismont*
Kevin Roufling: *Victor Leclère*
Maude Vèrdi: *Alison Philippart*
Docteur: *Fernand Michiels*
Infirmière1: *Nathalie Bertemes*
Infirmière2: *Nathalie Fontaine*
Pompier: *René Longrée*
Li chef di service: *Anne Dehasque*

La Royale troupe BEN-RIO de BERLOZ.

Dècôr.

Li sinne riprésinte « l'acceuil des urgences ». I n'ârê kékès tchèyîres Qwand on drouve li ridô deûs infirmières èt on docteur ratindèt l'ambulance.

- Infirmière1** : Qu'ont-ti anonçi à l'radio ?
Docteur : Qwat' blèssès...
Infirmière2 : Kibin d'ambulance ?
Docteur : Qwat' vôiâdjès pou l'mînme ambulance...
Infirmière1 : C'est dont grâve po tos lès qwates ?
Docteur : **Dji n'sés né ! Lès pompiers m'ont dit qui falèt qwat' voyâdjès avou l'ambulance !**
- Infirmière2** : Sé-t-on di qwè i sont st-aksû ?
Docteur : Brûlur', cous, Fractûr' et nôjé !
Infirmière1 : Qwè-c' qui c'est po in' accidint ?
Docteur : *(On ètind l'ambulance qui arriv')* **Nos d'alons l'sawè, lès v'la ! (I sôrtèt tos lès treûs)**
- (Rintrant tos lès treûs avou Djulien èt on pompier)*
- Pompier** : **Djulien Blawète, 17 rowe dès bons amis, Broulé inte lès djambes èt dès côps so tièsse. N'a nin supwèrté qu'on prinse in' ôte blèssî avou nos ôtes è l'ambulance. Nin âhêye à mèstrî.**
- Djulien** : **Waïe... Waïe... i m'faléz-v' tote li plèce po t'ni mès djambes â lâdje... Douc'mint vos ôtes avou on mèsbrudjî !**
- Docteur** : **Ça va d'aler môssieû... Achidez-vous la, l' timps d'rimpli les papîs...**
- Djulien** : **M'assîr ? Vos èstéz sot vos... Dji n'sâreû m'assîr... Dj'a st-on cou come li pot d'ine sitouve...**
- Infirmière2** : **Ossu mâssî ?**
- Djulien** : **Nèni... Ossi rodje èt ossi tchôd...**
- Infirmière1** : **Dji va kwèri in' saqwè po v'raspoyî... (Èle sôrtêye)**
- Pompier** : **Dji m'va kwèri lès ôtes ! (I sôrtêye)**
- Infirmière2** : **Dji va k'minçi à fé voss' dossîr ! (Èle prind dè papî à rimpli)**
- Docteur** : **Amin.n'em mossieû tossi râde qui s'dossier s'ra fè...(I sôrtêye)**
- Djulien** : **Kimint djâse-ti là, lu ?**
- Infirmière2** : **Li docteur nos vint di Charlerwè ! Volà... Voss' no ?**
- Djulien** : **Djulien Blawète**
- Infirmière2** : **Vost' adrèsse ?**
- Djulien** : **17, rowe dès bons amis... Waïe...**
- Infirmière2** : **Qui s'a-ti passé ?**

Djulien : **Dji voléz-v' fé on barbecue. Dj'aveû dèdjà mètou l'feu à kékès papîs, mais li feu ni prindéz-v' nin. C'est adon qui dj'a avu l'idêye de mète di l'alcool à brouler so lès tchèrbons di strivê...**

Infirmière2 : **C'est qwè lès tchèrbons di strvê ?**

Djulien : **Li hoye... Po l'fé insprinde pus vite. Dj'aveû è fournil on bidon di vint lites d'alcool à brouler, dj'èl prinda, mins dji n'a nin polou divistrer l'bouchon. Dji mèta li bidon inte mès djambes po fwèrcî so l'bouchon. Li bouchon vina d'on côp, mins avou l'prèssion qui mès djambes fi so l'bidon, l'alcool spritcha foû è s'ala rispande so l'barbecue. Come dj'aveû dèdjà sayî di mète li feu â papî, i d'moréz-v' dès blawètes rodjes, l'alcool s'insprinda. Dj'a vèyou li blame rimonter li spritcha è moussî è bibon. Dji m'a di, tot va èsploser, dji n'tchantrê mây pus d'vins lès basses. Mins nèni, l'alcool s'a mètou a brouler à l'intrêye de bidon, è s'n'a ti avu in' blame qui vinéz-v' foû de bidon come on réacteur. Mi qui sèréz-v' li bidon avou mès djambes, dj'a décolé come in' fusêye èt dji m'a r'trové è djârdin sèt mohones pu lon...**

Infirmière2 : **Eh bin... On pou dire qui vos avéz avu de l'tchance...**

Infirmière1 : **(Intrans avou dès crosses) Vochâl dès crosses por vos !**

Djulien : **Mèrci...**

Infirmière2 : **Èt lès côps so voss tièsse ?**

Djulien : **Ine fêye qui dj'a décolé, dj'a r'sintou qui dji passéz-v' ad-triviè d'ine saqwè di bwè... Èt pwis on grand choc èt on bru d'èwe...**

Infirmière1 : **(Qu'a lèhou li rappôrt) Vos avéz décolé avou l'bidon ?**

Infirmière2 : **Awè ! Èt i l'a pètè s'tièsse qwand i l'âre atterri, c'est bin çoulâ Moncheû Blawète ?**

Djulien : **Awè ! Waïe...**

Docteur : **(I l'intèure. On ètind arriver in' ôte ambulance) Vènéz « droci » mossieû dji m'va vos sognî !**

Djulien : **Ça tome bin, pace qui vochâl dès ôtes ! (I sôrtêye avou l'docteur) (Lès deûs infirmières sôrtèt totes lès deûs)**

(Rintrant totes lès deûs avou Pière, Kevin èt l'pompier)

Pompier : **Pièr Roufling èt Kevin si fi, 19, rowe dès bons amis. Brèsse cassé po l'père èt pî sprâtchi po l'fi, li père n'a nin volou qui dji prindasse in' ôte blèssî avou nos ôtes. Tos lès deûs ossu cagnèsse qui l'prumî.**

Pièr : **(À pompier) Taihéz-v' ! Si dj'apice mâye li ciss' qui m'a bouhî dju...**

Kevin : **On l'î va fé passer on mâva qwârt d'èure...**

Infirmière1 : **Wice avéz-v' mâ moncheû ?**

Pièr : **Tot costé ! Mins dji creûs qui dj'a li brèsse spiyî !**

Infirmière1 : Èt vos djône ome ?
Kevin : Dj'a mâ m'pî ! Mi papa m'a toumé d'ssu avou lès ustêyes èt li rèsse dè l'hâle.

Pompier : Dji m'va kwèri lès ôtes ! (*I sôrtêye*)
Infirmière2 : Li doctêur va st'arriver, i l'èst st'ocupé avou voss' vwèzin !
Pière : Mi vwèzin ? Qué vwèzin ?
Infirmière1 : Moncheù Blawète !
Kevin : I l'èst blèssî ossu lu ? Qu'a-ti ?
Infirmière2 : I l'a s'tu broulé...
Infirmière1 : (*Prindant di qwè s'crire*) Qui v's a-ti arrivé moncheù Roufling ?

Pière : Dji r'nètî-v' mi coronis' so ine hâle di ût mètes. Dj'esteû tot à l'copète, qwand dj'a ètindou on hufèl'mint... Tchiiii.... Li hufèl'mint vinéz-v' di m'hintche. I s'aprèpi-v' di mi. Dji n'a nin avu l'timps di m'ristourner po vèyî çou qui c'esteût. Dj'a ètindou craker li hâle. Li hufèl'mint a passé à dreûte. Li hâle esteût còpêye è deùs èt dj'a toumé. (*I mosteûre ine saqwè qui passe di hintche à dreûte to huflant èt pwis lu qui tome*) Tchiiii... èt Boum... Qwand dji m'a r'mètou di m'chute, dji tinéz-v' co todis on mète di hâle divins mès mins...

Infirmière2 : Èt vos Kevin ?
Kevin : Mi dji t'néz-v' li hâle. Dj'a ètindou li hufèl'mint, dj'a r'lèvé l'tièsse èt dj'a vèyou d'hinde mi papa avou li d'zeûr dè l'hâle qui n'aveû nin laché. Dji n'a nin polou cori èvôye à tins èt mi papa èt to l'rèsse m'a toumé d'ssu.

Infirmière1 : Nos alans vi fé in' radio à tot lès deùs.
Pière : Mins qu'est-c' qui c'est qu'a v'nou sipiyî mi hâle come çoulà ?
Infirmière2 : Dj'a l'épinse qui c'est moncheù Blawète qui to passant âre stroukî voss' hâle.

Pière : Èt c'est lu qui hufléz-v' insi ?
Infirmière2 : Vos v's èsplikrèz pus târd avou lu !
Infirmière1 : Vinéz avou mi tos lès deùs.
(*I sôrtê tos lès treùs po aller à l'radio. On ètind l'ambulance qui arriv'*)
Infirmière2 : Vochâl li treûzinme ambulance ! (*Èle sôrtêye èt rinteûre ossi vite avou Françwè, Maude èt li pompier*)

Pompier : Françwè Verdi èt Maude Verdi si fêye, 23, rowe dès bons amis, (*l'infirmière1 rinteûre*) on a ritrové moncheù sins consciyince, assomé po l'pus sûr èt si fêye a d'vou èsse désincarcérêye.

Infirmière2 : Désincarcérêye di wice ?
Pompier : Fou dè batche â jèbe dè l'tondeûse a gazon !
Françwè : Wice so-dj' ?
Infirmière2 : Â urgences, moncheù !

Pompier : **Dji m’va fé li dièrin voyêdje ! (I sôrtêye)**

Maude : **Ça va-ti papa ?**

Françwè : **Ah ! Vos êstéz là ossu parêt vos ?**

Maude : **Awè... (Li chef di service inteûre)**

Chèf di service: **Qui s’passe ti châl ? On vint di m’houkî â bloc, pace qui vos avéz mèsâhe d’on côp d’min !**

Infirmière2 : **Awè madame ! Cink blèssîs sont dèdjà châl èt i va co arrivéz eune ambulance...**

Chèf di service: **Qui s’a-ti passé moncheù ?**

Françwè : **Dji n’sè pus, dj’a s’tu maqué, dji n’mi sovint di rin !**

Chèf di service: **Èt vos mamzèle, savéz v’ çou qui s’a passé ?**

Maude : **Nos êstîz à l’ovrêdje di tonde li pelouse mi papa èt mi. Qwand dj’a vèyou arriver so nos ôtes in’ saqwè di gros qui voléz-v’.**

Infirmière2 : **Vos n’avéz nin sondjî ?**

Maude : **Nèni ! C’èsteut moncheù Blawète so in’ fuzêye... Èt ni m’prindéz nin po in’ sote... Dji l’a bin vèyoû.**

Chèf di service: **Bon... Nos ârans dès détails pus târd ! Mam’zèle, èminéz moncheù Françwè èt mam’zèle Maude à l’radio. (Li docteur inteûre avou Djulien qu’a todi ossu mâ) Ah ! Vochâl li docteur !**

Docteur : **(A Djulien) Mètéz-vous lauvau mossieû, on va v’nu vos kè dins pon’t tîmps pou vos mion.ner dins vos tchamp’. (L’infirmière1 rinteûre)**

Djulien : **Mins dji n’vou nin d’morer châl mi, dj’a on barbecue à apruster !**

Docteur : **Vos barbècucue ratindra bé èn’ aute djou...**

Chèf di service: **Docteur vochâl in’ ome qu’a s’tu assomé èt si fêye qui veû voler dès omes so dès fusêyes...**

Maude : **Dji v’di qui dji n’sondje nin ! Dj’a bin vèyoû moncheù Blawète so in’ fuzêye qu’a r’toumé so m’papa. Mi papa a s’tu sonné so l’côp ! Moncheù Blawète a rispitéz avou l’flamme â cou èt i m’a tchoukî d’vin li batche â jèbe !**

Chef du service: **Pôve pitite fêye... Èle piède sès djêyes...**

Djulien : **Nèni, èle ni piède nin sès djêyes ! C’èsteut bin mi so l’fuzêye come èle dit.**

Maude : **Ah ! Vos vèyéyèz qui dj’aveu rêzon !**

Docteur : **(A l’infirmière2) Mam’zèle, min.néz l’assommé èyèt ‘s fêye à l’radio !**

Infirmière1 : **Mins moncheù l’docteur i n’a dèdjà deùs blèssîs à l’radio ! Dj’èl z-è min’rê si vite qui lès ôtes sèront riv’nou !**

Chèf di service: **Dji m’va disqu’a radio, vèyî çou qui s’î passe ! (Èle sôrtêye)**

Docteur : **(A Françwè) Ça va-ti mossieû ? Vos r’vènéz a vous ?**

Françwè : **Wice so-dj’ ?**

Docteur : **Aus’-urgences... Al’ clinique...**

Françwè : Poqwè ???
Docteur : Vos avéz yeû èn' aksidint...
Françwè : Avou m'tondeuse ?
Docteur : Nonfé...! Avè vos vijin !
Maude : Sov'néz-v' papa, nos tondî li pelouse...
Françwè : Dji m'sovint asteûr... Dj'a ètindou huffer in' saqwè podrî mi... Dji m'a r'tourné èt dj'a pris è plinne tièsse in' saqwè qui v'néz-v' dè cîr...
Djulien : C'èsteût mi...
Françwè : Nèni... Impossibe... C'èsteut on martien... Avou l'feu â cou... I m'a stroukî, mins dj'a avu l'tins dè l'vèyî 'nn'aller !
Djulien : C'èsteut mi qui dji v'di...
Françwè : Nèni... Impossibe... i l'a r'dècolé à l'vitèsse dè l'loûmîre èt ça sintéz-v' li broûlé...
Djulien : Ça po brouler... Ça brouléz-v'... Dji sé çou qu'dji di...
Docteur : Dji pous vos-assûré qu'i sés çu qu' brûler vout dire...
Chèf di service: (*Li chèf di service rinteûre avou Pière èt Kevin*) Volà... c'est bin çou qu'on pinséz-v'... Moncheû à l'brèsse sipiyî, mins l'djône ome n'a nole fracture... A suvant !
Infirmière1 : (*A Françwè*) Vinéz moncheû dji v'va êdî...
Françwè : Oh !!! Vos èstéz in' andje qui vint dè cîr ossu vos ?
Maude : Poqwè d'héz-v' çoulà, papa ?
Françwè : In' andje c'est to blanc èt come lès martiens sont châl... Poqwè nin dè andjes !
Djulien : Volà qui m'prind po on martien asteûr !
Infirmière1 : Oh la la la ! Ça va èsse ine saqwè dè l'ravu...
Docteur : Dji va d'mèrèr avou lî...
Infirmière2 : (*A Maude*) Vinéz ossu mam'zèle, nos alant acpagner voss' papa ! (*I sôrtê tos lès qwates puss li docteur. Li chèf di service voléz-v' sôrti avou lès ôtes mins si r'prind qwand èlle ètind l'ambulance arriver*)
Chèf di service: Vochâl co in' ambulance... Dji m' va vèyî... (*Èle sôrtêye èt rinteûre ossu vite avou Djâke ,Léa èt l'pompier*)
Pompier : Djâke Citerne, 15 rowe dè grandes êwes à Lîdje...
Djulien : Dji n'a to d'minme nin situ disqu'a Lîdje ?
Pompier : Nèni ! Moncheû Citerne fiséz-v' on numéro di clown po lès ânêyes di Léa Brasse, 31, rowe dè bon amis...
Chèf di service: Di qwè soffrê-ti ?
Pompier : I z-on mâqué di s'nèyî tos lès deûs... On a d'vou fé li boke à boke à moncheû Citerne !
Djulien : Bêêkkk... Dj'inme otant por vos qui por mi !
Pompier : Oh mins çî n'est nin mi qui l'a fê, c'est noss' djône stagiaire di 22 ans... Vos dirî Brigitte Bardot à 20 ans... A pône aveût-èle

kiminçi qui s'a r'lèvé to d'hand qu'on n'rimplih' nin on
Citerne avou d'lêr...

Chèf di service: Li doctèur va st'arriver... Èt vos mam'zèle qu'avéz-v' ?

Léa : C'èst l'clown qui to toumant è l'piscine s'a rapicî à mi, èt dj'a
toumé è l'êwe ossu !

Pompier : Vos d'vrî aprinde à nêwî, ça chève todis...

Léa : Mins dji sé nêwî ! Seûl'mint c'èst lu qui n'sé nin, i l'aveû
sogne èt i s'tinéz-v' tél'mint à mi qui m'a èpwèrté è fond...

Djulien : Vos n'savî nin lacher l'èfant vos ?

Djâke : Dji l'a laché... Câse dè l'doleûr

Léa : Vos n'pinséz to-d'minme nin qui dj'aléz-v' mi lèyî èpwèrter vè
l'fond par vos ?

Chèf di service: Qu'avéz-v' fê ?

Léa : Minme diso l'êwe, on côp bin mètou... On n'veut nin lès lâmes
qui corrèt, mins dj'a bin sintou qui m'lachéz-v'...

Chèf di service: Wice avéz-v' mâ ?

Léa : Nole pâ, mins tot l'monde a dit qui valéz-v' mî passer in' visite
po èsse sûr !

Chèf di service: Èt vos moncheù li clown wice avéz-v' mâ ?

Djâke : Â gazî... Li madronbèle là qui m'a fê li boke à boke a tchoukî
s'deût si lon è m'gazî qui dji pinse qu'èlle a d'vou sinti li
k'minc'mint di mi stoumac...

Chèf di service: Èt c'èst tot ?

Djâke : Nèni... I n'a ossu li côp qui dj'a r'çu diso l'êwe... Li doleûr
rimonte...

Chèf di service: Li deût qui d'hind èt l'doleûr qui r'monte... Si i s'rècontrê,
nos ârans pus âhêye dè ciblè li mâ !

Pompier : Come tot l'monde èst châl dji 'nnè r'va à l'casèrne. (*I sôrtêye*)

Chèf di service: (*A Djâke èt Léa*) Vinéz vos deùs, dji v'va mimer â prumî
astèdje...

Léa : Nèni... Dji n'vou pu èsse avou li clown... Si i tome dè l'civière
i l'èst capâbe di s'rapicî à mi èt di m'fé toumer ossu... C'èst st-
on dandjî public, cilà !!!

Djâke : Dji so d'solé mins ça a s'tu on rèflèx...

Chèf di service: Vinéz todis avou mi moncheù... (*I sôrtê tos lès deùs*)

Pière : Qui s'a-ti passé Djulien ?

Djulien : Tais-tu Pière... Dj'a fê on voyêdje di tos lès diâle...

Infirmière2 : (*Intrant avou dès radio*) Moncheù Pière Roufling, on v'va v'ni
kwèri po mète voss' plâtre...

Pière : (*A l'infirmière*) Awè... Merci... (*A Djulien*) Raconte Djulien...
Pace qui dji n'comprend nin qui l'infirmière a dit torad qui
c'èsteut twè qui m'a bouhî dju di m'hâle.

Kèvin : Nos vîrîz bin savu qwè èt come...

Infirmière2 : (A Léa) Èt vos m'am'zèle vinéz, dji v'va fé intrer è cabinet de docteur... (Èle sôrtêye avou Léa)

Pière : Asteûr qui nos èstant inte di nos ôtes... Si c'est twè qui m'a bouhî dju, i m'fârê in' novèle hâle, èt c'est twè qui m'èl pâyrê...

Kévin : Èt mi dès novès solés...

Djulien : Vos poléz èsse sûr qui dji v'ripâyrê tot çou qui dj'a distru...

Docteur : (Intrant avou Françwè èt Maude) V'là mossieû, dimèrèz droci, dji va vos trouver ène tchamp' ...

Françwè : Di wice èstéz-v' vos docteur ?

Maude : Ni d'héz rin papa, ça pôreut v'fé de mâ à voss' tièsse...

Docteur : Qui du contrèr' djon.ne fiye... Ça vout dîr' qui vo papa r'vèt tout douc'mint avè nos-autes...

Pière : C'est vrêye docteur qui vos n'èstéz nin di-d'-chal vos ?

Docteur : Nonfé, dji sus d' Châlèrwè...

Pière : Ça s'ètind...

Kévin : Ça s'veût ossu..

Docteur : Comint c'qui ça s'wèt ?

Kévin : Bin awè... I l'èst come lès zèbes... neûr et blanc...
(I riyêt turtos)

Djulien : Ni m'fé nin rire... Dj'a mâ qwand dji zoup'têye di rire...

Pière : Èt mi dj'a mâ mi brèsse qwand dji hosse...

Françwè : Mi c'est m'tièsse... Vos dirîz in' èglise vûde...

Kévin : Mi dj'inme bin de rire...dji prind m'pî come on dit... Èt vos Maude ?

Maude : Dji veut qui m'papa kimince a aller mî, adon dji so continte...
(I riyêt turtos)

Docteur : (Mâva) Ôw ! C'n'èst né ène coû di s'cole drocichâl ! Vos èstèz aus-urgences ! N'rouvîyèz né ?
(I s'arèstèt turtos di rire)

Djulien : Mins docteur...

Djulien, Pière, Françwè : Qui l'y print-ti djâser insi ???

Chè di service: (Intrant) Bon, moncheû Roufling c'est mi qui va fé voss' plâtre !

Docteur : Mi, dji m'vas vîre mossieû Citèrne, pasqui droci, c'est l'cirque...

Maude : C'est pus vite là qui vos aléz qui c'est l'cirque ! Moncheû Citèrne èst st-on clown...

Docteur : Ça va, l'èst bon insi ! (A l'chè di service) Wètèz di trouver dès tchamp' pou les cès qui d'mèr'nut çi èt di rèvoÿî lès aut' a leu manjô. Merci ! (I sôrtêye)

Chè di service: Èt vos m'l'avéz mètou di mâle oumeûr à l'copète de martchî... I n'mâqu'èz-v' pu qu'çoulà !

Pière : Kévin, dj'atake a s'avu sogne... Èle n'a nin l'êr fwèrt tinrûle...

Kévin : Nâyî-z' nol sogne papa, dji sèrê là... (*Pière louke li chèf di servive èt louke Kévin*)

Pière : Djulien, ti n'vou nin vini avou mi... Èle mi fê sogne...

Chèf di service: Qu'èst-c' qui vos groumtinéz là inte di vos dints vos ?

Pière : Rin... Dji d'héz-v' dj'âreùs co bin mâ mi pogne...

Chèf di service: (*Prind li radio èt louke tos près di Françwès*) Dji n'veû portant rin à voss' pogne...

Françwè : (*Qu'a vèyou li radio tot près d'lu*) « La voie lactée » ... C'èsteut don bin lès martiens ?

Maude : Aïe aïe aïe, volà qui ratake avou sès martiens... (*L'infirmière1 inteûre avou Léa*)

Infirmière1 : Vos n'avéz rin... On pô choquêye, mins rin di grâve...

Léa : Merci... Vos n'avéz nin vèyou mi GSM ? Dji so sûre qui dji l'aveû qwand dj'a monté è l'ambulance !

Kévin : Nos n'avant rin vèyou...

Chèf di service: Vos poléz houkî adlé vos par li tèlefone...

Léa : Dj'èl va fé don còp po qu'on m'vinse rikwèri...

Docteur : (*Amoussant avou Djâke èt l'infirmière2*) La, tout l'monde sèt çu qu'il a... Les cès qui d'mèrnut ci èt les cès qui pour'nut èraler.

Djâke : (*A Djulien*)L'infirmière m'a raconté voss' décolage... Qué afère ! Dji vòreû bin fé on numéro insi ! Dihéz-m' kimint vos avéz fê...

Léa : Ni d'héz surtout rin moncheû Blawète... Pace qui si i sâye mâye di fé come vos i n'ârêt dès mwèrts.

Kévin : C'èst çoulà... Continuwéz à fé l'clown, ni v's èbarquéz nin divins çou qui vos n'kinohéz nin...

Docteur : C'èst trop dandj'reû pour vous !

Pière : Djulien, ti nos a nin dit çou qui s'a passé !

Djulien : Dji voléz-v' fé on barbecue èt...

Pompier : (*Inteûr avou on GSM*) Ine sakî a rouvi on GSM è l'ambulance...

Léa : C'èst d'a meune... Merci.

Pompier : C'èst to r'nétant li véhicule qui dji l'a r'trové !

Chèf di service: (*Â pompier*) Moncheû, voléz-v' bin rèminer lès djins qui polèt rintre dilé zèl ?

Pompier : Dji n'pou nin madame, pace qui si i n'aveu dandjî di l'ambulance dji m'freût hètchî lès orêyes par mi chèf...

Françwè : N'as-ti nin moyin d'avu on pô d'silence... Dji vòreû bin savu poqwè dji so chàl. Porsuvéz Djulien...

Djulien : Dji va fé court . Barbecue nin prinde, alcool dissu, CHIIII, CRACK, BOUM, PLOUF. Stop

Infirmière2 : I l'a décolé avou bidon d'alcool
Pièrè : C'èst twè qui hufléz-v', qu'a sipiyî mi hâle èt qui m'a bouhî dju.
Kévin : Mi papa à toumé sor mi câse di vos
Françwè : C'èst twè qui m'a assomé.
Maude : C'èst lu qui m'a èclawé divin li batche â jèbes.
Djâke : C'èst vos qui m'avéz fê toumer è l'piscine, wice qui dj'a mâqué di m'nèyî.
Léa : C'èst st'a câse di vos qui dj'a s'tu hètchêye è l'èwe avou l'clown.
Docteur : C'est vous qu'a provokè ène mârghâye parèye ?
Chèf di service: Câse di vos li docteur èst di mâle oumeûr...
Infirmière1+2 : Èt tot çoulà poqwè ?
Djulien : Po fé on barbecue...
Djâke : Si vos avéz dandjî d'in' sakî po amuser vos invités, vos poléz conter sor mi...
Kévin : Vos avîz invitéz dès djins ?
Djulien : Nèni...
Pièrè : Come dji v' kinohe, c'èsteut on barbecue por vos èt voss' feume !
Djulien : Awè !
Chèf di service: Èt vos alîz fé cure qwè ?
Djulien : Treûs sâcisses...
Pompier : Èt tot çoulà...
Turtos : PO TREUS SÂCISSES ??????
Djulien : Awè...
Turtos : PO TREUS SÂCISSES ??????
Djulien : Awè...
Turtos : PO TREUS SÂCISSES ??????
Djulien : Awè !!!

Ridô